

Carta Cha Xihna Ri Sacuhun Ra Apóstol Pablo Chi Ñáyiví Ñuu Tesalónica Cha Yihí Cuenda Nyoo

Nu tyaa ra Pablo ta ra tahan ra noo tutu chi ñuu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñuu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó ñni ñuu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo. ³ Tyicuan ri yihí ñni ndi tuhun ndo nuu Nyoo Sutu yo ta nichón ñni ndi vatyí ñni ñni ndo chinó ñni ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñni ñni ndo yihí ñni ndo cha cuañihi ndo cha cuenda ra Jesucristo. ⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo. ⁵ Vatyí quiví cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chi ndi, ta cuaha xaan sacuvi ra chihin

tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quivi chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natin cuenda ndo tuhun Nyoo, vasi cuaha tindoho nyehe ndo cha cuenda cuan. Soco sñi xaan cuñi ndo vatyí maa Tatyí Ii chahá tusñi iñi cuan chi ndo. ⁷ Ta cha tyicuan caa, tyinyeé xaan ndo chi tandihí ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyí nyehé ñu cuhva iyó ndo chihin Nyoo. ⁸ Ñima ityi Macedonia ta Acaya ri, soco tandihí ri ityi nu chiñi ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña niñi ca cha cahan ndi tuhun Nyoo chihin ñu. ⁹ Vatyí suri maa ñu nacatyí ñu chi ndi yoso caa cha vaha xaan tin cuenda ndo chi ndi quivi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quivi sacutuñi ra chi ñáyivi.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahan ndi chichan ndi tuhun Nyoo ñuu ndo. ² Vatyí chitó ndo yoso caa nyehe ndi tindocho saha ñáyivi ñuu Filipo cha ni cumañi ca chaq ndi ñuu ndo. Ta vasi nyehe xaan ndi tindocho ñuu cuan soco quivi chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduvi ñáyivi ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra añima yo. ³ Vatyí tuhun cha chaha ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴ Ñahri cha ña vaha cahan ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chi ndi. Vatyí ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo. ⁵ Ta nyoho chitó ndo vatyí ni noo chaha ña cahan ndi chihin tuhun tyaqui cha cuñí ndi sandavi ñaha ndi chi ndo. Ta ni ñima cha cuñi ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶ Ta ni noo chaha ña nanducu ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi siqui ndo cha tyicuan caa. ⁷ Soco cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸ Cuñí xaan ndi chi nyoho, ta cahvi iñi ndi vatyí ñima tuhun Nyoo

ri cuhva ndi chi ndo, soco nyacua nya ñayiv̄i ndi ñandih̄i, cha cuenda cha cuñí ndi chi ndo. ⁹ Nyoho yañi, nicohón iñi ndo yoso caa saha tyiño ndi quiv̄i chinyicu ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi siqūi ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandih̄i, vatyí maa ri cha vaha ta cha ndaa chinyacuv̄i ndi quiv̄i chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuv̄i ndi, ta ña chaha ndi cuhva vatyí cahan ña vaha ndo siqūi ndi. ¹¹ Ta chitó tucu ndo yoso caa sanduní ndi iñi noo noo ndo chihin tuhun chaha ndi chi ndo. Sandunyeē ndi iñi ndo tari noo ra chihin sehe ra. ¹² Ta catȳi ndi chi ndo nacachi coo ndo tari tahán chi coo ñu yih̄i cuenda Nyoo. Vatyí maa ra nacanā chi ndo vatyí coo ndo nu nyacá ñaha ra, ta nyehe ndo cha tyaqūi gloria ra.

¹³ Yucuan chaha tyicuan ri nacuhvá ndi tyahvi nyoo chi Nyoo, vatyí quiv̄i chiñi ndo tuhun ra cha cahan ndi chihin ndo, natīn cuenda ndo vatyí nacoto ndo tyi tuhun Nyoo cuví ta ñima tuhun ñáyiv̄i ri. Ta ndicha cha tuhun Nyoo cuví, vatyí sacuv̄i chi vatyí chino iñi ndo chi Nyoo ta nasamā ndo cuhva iyó ndo. ¹⁴ Yahā cuan ta nyehe tucu maa ndo tindoho saha ñáyiv̄i ñuu ndo, tari nyehe tucu ñu yih̄i cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyiv̄i tahan yo cuenda ra Cristo cuan. ¹⁵ Ta ican ñu Israel cuan cachahñi chi Sutu Mañi yo Jesús tari cachahñi tucu ñu chí ra profeta, ra cachahā cuenda tuhun cahán Nyoo

ta ityi chata ca. Ñu Israel cuan tava ñehe ñu chi ndi. Ñima cuhva cuñi Nyoo iyó ñu. Ta tasi cuñi ñu nyehe ñu chi tandihi ñáyivi. ¹⁶ Tatu cuñi ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndihi tuhun cutachi tuñi xaan Nyoo chi ñu.

Nu catyi ra Pablo vatyí cuñi ra cunyehe ra nu nyicú ñu Tesalónica inga chaha

¹⁷ Yañi, cha yaha cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha. ¹⁸ Ta nducu ndi cuhva cuhun ndi soco ña cuví. Ta yuhu ra Pablo ñandihi, cuaha xaan chaha nduqui cuhva cuhun ndi, soco tahan ri chaha cha cuñi ndi cuhun ndi ta ña chaha ra ña vaha. ¹⁹ Soco ¿yóó chi ita iñi ndi? Ta ¿yóó chi cuenda cusí cuñi ndi, ta vaha cuñi ndi? ¿Atu ñima cha cuenda maa ndo cusí xaan cuñi ndi nuu Sutu Mañi yo Jesucristo quivi quichi ra inga chaha? ²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sí xaan cuñi ndi cha cuenda cuan.

3

¹ Ta yucuan chaha ña cunyehe que cha ma cote yoso caa cuahan ndo chihin Nyoo. Ta natyái iñi tyi ndoi ñuu Atenas. ² Ta tachí chi yañi yo ra Timoteo na cuhun ra cunyehe ra chi ndo. Maa ra sacuví ra tyiño nuu Nyoo vatyí ñin ri chihin ndi cahán ra tuhun yoso caa cacú añaima yo sahá ra Cristo. Tachí ndi chi ra nu nyicú ndo na sanduní ca ra

iñi ndo ta sandunye ca ra iñi ndo tacuhva vatyí chinó ca iñi ndo chi Nyoo. ³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindocho. Vatyí nyoho chitó ndo vatyí nyaá yo cha nyehe yo tindocho tyehe caa. ⁴ Vatyí ta ninyaá ca ndi chihin ndo, catyí ndi chi ndo vatyí cha cuñí quichi quivi cha nyehé yo tindocho. Ta chitó vaha maa ndo tyi tyicuan caa cuvi. ⁵ Yucuan chaha ña cunye que cha cuñí cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyí yuhví coto sandavi ñaha cuhna chi ndo ta nandihvi tucu ndo nu quiñi caa inga chaha. Vatyí tu tyicuan caa, cucunaa tandihí tyiño saha ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyí ñí iñi ndo chinó iñi ndo chi Nyoo. Ta cuñí xaan ndo chi tahan ndo. Ta catyí ra tyi tyicuan ri nicohón iñi ndo chi ndi ta cuñí xaan ndo nyehe ndo chi ndi, tari nyuhu, cuñí tucu maa ndi nyehe ndi chi ndo. ⁷ Yucuan chaha, yañi, vasi cuaha cha cuví chi ndi ta nyehé ndi tindocho, soco vaha xaan cuñí ndi cha chitó ndi vatyí nyoho vaha chinó iñi ndo chi Nyoo ta ña sañá ndo chi ra. ⁸ Tari quivi cha nduchaa ñayivi ndi, cuñí maa ndi cuhva cha nacoto ndi vatyí nyoho ñihi cuahan ndo chihin Nyoo. ⁹ Nyacua ña ñihí ndi cuhva nacuhva ndi tyahvi nyoo chi Nyoo cha cuenda ndo. Vatyí si xaan cuñí ndi nuu Nyoo cha cuenda vatyí vaha cuahan ndo chihin ra. ¹⁰ Chicán tahvi xaan ndi chi Nyoo ñicahñu ta cha cuaa, vatyí cuñí ndi cahun ndi cunyehe maa ndi chi ndo. Tyicuan ta cuvi sandunaní ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cahun ndi nu nyicú ndo. ¹² Ta na tyinyee ca Sutu Mañi yo Jesucristo chi ndo tacuhva cuñi ca ndo chi noo noo tahan ndo ta chi tandihí ñáyiví tari cuñi nyuhu chi nyoho. ¹³ Tacuhva vatyí cuní ca iñi ndo ta cunduvii ndihí aña ndo. Ta ma coo ca cuatyí ndo nuu Nyoo Sutu yo quiví quichi tucu Sutu Mañi yo Jesucristo chihin tandihí ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quiví.

² Nyoho cha chitó ndo yoso caa chaha ndi cuhva chi ndo tari chaha tucu maa Sutu Mañi yo Jesús cuhva chi ndi. ³ Cha cuñi Nyoo, ican cuví ihya: Cha ñacuhva ndihí ndo chi ndo chi ra tacuhva sanduvii ndihí ra aña ndo. Ta ni noo ndo ta ma coo ndo chihin noo ñaha síhi o rayíi tatu ñima ñasihí o yíi ndo cuví. ⁴ Ta tahan tahan ndo cuñi chi coto ndo yoso caa coo ndo chihin ñasihí ndo. Coo vii ndo chihin ña chihin cha cuñi ndo chi ña. ⁵ Ñima chihin cha quichi cuvi iñi ndo cha quiñi caa tari nyacuví ñáyiví cha ña ñohó nuu chi Nyoo. ⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihí ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyí ndi chi ndo. ⁷ Vatyí Nyoo nacana ra

chi yo vatyi tacuhva sacuvi yo cuhva cuñí maa ra, ta ñima noo cuhva quiñi caa. ⁸ Ta yucuan chaha yóó ñu cha ña cuñí tyasoho tuhun ihya, ñima tuhun ñáyiví ri ña tyasohó ñu, soco tuhun Nyoo ña tyasohó ñu. Vatyi suri maa Nyoo chaha ra Tatyí Ii ra chi ndo. ⁹ Soco tuhun cha cuñí yo chi tahan yo, ña chiñuhú cha tyai nu tutu ihya tuhun cuan. Vatyi suri maa Nyoo cha sañaha ra chi ndo vatyi cuñi yo chi tahan yo cuenda Nyoo. ¹⁰ Ta tyicuan caa cuñí ndo chi tandihí tahan yo nicahnu Macedonia chiña. Soco chacú ndahvi nuu ndo yañi, vatyi na cuñi ca ndo chi ñu noo noo quiví. ¹¹ Nducu ndo cuhva coo vii ndo. Ta ma tyihí ndo chi ndo nu ña tahan chi, soco ñn ri tyiño maa ndo caca xiñi ndo. Ta saha tyiño ndo chihin ndaha ndo tari cuhva catyí ndi chi ndo quiví cuan. ¹² Tyicuan caa sacuvi ndo tacuhva vatyi ñáyiví ña ñohó nuu Nyoo cuasaha ñu ñáyiví chi ndo. Ta ñahri cuacumañi chi ndo.

Yoso caa cucuvi quiví quichi Sutu Mañi yo Jesús inga chaha

¹³ Yañi, ña cuñí ndi cha ma coto ndo ñáá cha cuví chi ñáyiví chihí, vatyi coto nducuihya iñi ndo tari nducuihyá iñi ñáyiví cha ma tahan chi nyehe chi Nyoo. ¹⁴ Ta tari cha chinó iñi yo vatyi chihí ra Jesús ta nandoto ra, tyicuan caa chinó tucu iñi yo vatyi Nyoo cusanandoto ra chi ñu ndiyí cha chinó iñi chi ra.

¹⁵ Yucuan chaha catyí ndi chi ndo tari sañaha Sutu Mañi yo chi ndi. Vatyi yoó cha nyitó yo nyacua nya quiví quichi ra, ñima xihna ca yo cahun ican saha ñu cha yaha chihí. ¹⁶ Vatyi suri maa Sutu Mañi yo cunoo xica ra andiví, ta cucana chaa ra

vatyí maa ra cuví ra nyacá ñaha. Ta cucana chaa noo ra cuví nuu chi ángel. Ta cunativí trompeta Nyoo. Tyicuan ta ñáyiví cha yihí cuenda ra Cristo ta chihi ñu, xihna ca ñu cunandoto. ¹⁷ Yaha cuan ta yoó cha nyitó ca yo cundaa xica yo ñin ri chihin ñu nu vico, nu cunañihi tahan yo chihin Sutu Mañi yo ityi andiví. Ta yucuan ta cucunyaa yo chihin ra tyicuan ri maa. ¹⁸ Yucuan chaha sanduní ndo iñi tahan ndo chihin tuhun ihya.

5

¹ Soco ama o ñáá quiví cucuvi tuhun ihya, ña niñi cha cahin tuhun cuan chihin ndo yañi. ² Vatyí cha chitó vaha maa ndo vatyí ma tuví ri iñi yo ta cuchaa quiví quichi tucu Sutu Mañi yo. Vatyí tari cuhva quihví noo ra suhu vehe ñáyiví cha cha cuaa, tyicuan caa cucuvi. ³ Vatyí quiví cha catyí ñáyiví vatyí vaha xaan iyó ñu, ta ñahri maa cha yuhví ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihví cha uhví chi ña. Ta tyicuan caa cucuvi chi ñáyiví quiví quichi Sutu Mañi yo, vatyí ma cuví cono ñu. ⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chi quiví Sutu Mañi yo, tari sana iñi ñáyiví tatu quihví ra suhu vehe ñu. ⁵ Vatyí tandihí yo chitó yo yoso caa tahán chi coo yo vatyí Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuví yo tari inga ñu cuan. Tari quiví cha quixí ñu vatyí ña quichahá ñu cha ndichí Sutu Mañi yo. Soco yoó cuatu tuhva yo ta cachi coo yo. ⁷ Vatyí ñu quixí, quixí ñu cha cha cuaa, ta ñu chihi xaan

ndixi, chiñi ñu cha cha cuaa. ⁸ Soco yoó cha cuví yo ñu cuenda cha ñicahñu, nacachi cõo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi ñi yo chinó ñi yo chi Nyoo, ta chihin cha cuñi yo chi tandihí ñáyivi. Ta tari sindaro sahá cuenda ra xiñi ra chihin noo caa, tyicuan caa cuñi chi cha sahá yo cuenda chi yo chihin cha yihí ñi yo tyi cacu yo. ⁹ Vatyí Nyoo ña tyaá ra cuhva chi yo vatyí tachi tuñi ra chi yo, soco nacachi ra chi yo vatyí cacu yo cha cuenda Sutu Mañi yo Jesucristo. ¹⁰ Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra. ¹¹ Yucuan chaha sanduní ca ndo ñi tahan ndo ta sandunyeé ca ndo ñi ñu, tari cuhva cuahan nyacuví ndo vityin.

Nu chahá ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo. ¹³ Cuñi chi cha saha xaan ndo ñáyivi chi ra chihin cha cuñi ndo chi ra. Vatyí sacuví ra tyiño Sutu Mañi yo. Ta vaha cõo ndo chihin tahan ndo cuenda Nyoo.

¹⁴ Ta tyatyíño ndi chi ndo yañi, vatyí cuhva ndo tuhun chi ñu cha ña cuñi saha tyiño. Ta sanduní ndo ñi ñu cha ña ñi ca ñi. Ta tyinyeé ndo chi ñu vita cuñi vatyí ta chino vaha ca ñi ñu. Ta cucama ñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu

ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyiví.

16 Tyicuan ri cusí cuñi ndo. 17 Ta çacan tahvi ndo tyicuan ri maa. 18 Naçuhva ndo tyahvi nyoo chi Nyoo cha cuenda tandihí cha cuví. Vatyí ícan ihya cuví cha cuñí Nyoo cha sacuvi yo cha cuví yo ñu chinó ñni chi ra Cristo Jesús.

19 Ma ndahva ndo ñuhu Tatyí li cha nyaá añima ndo. 20 Ma cuacu nyaa ndo tuhun Nyoo cha cahán noo ra cahán tuhun चाहá Nyoo. 21 Tíin cuenda ndo tandihí cha cahán ra. Ta naquehen ndo cha vaha. 22 Cuachiyo ndo nuu tandihí cha quiñi caa.

23 Ta maa Nyoo ra iyó cha taxi ri chíi, na sanduvii ca ra añima ndo tacuhva vatyí in ri chí maa ra nacuhva cuenda ndo chí ndo. Ta na cocumi ra añima ndo ta cha chíni tuñi ndo ta coño ñuhu ndo tacuhva vatyí ma coo ca cuatyí ndo quiví quichi tucu Sutu Mañi yo Jesucristo. 24 Ra cha nacachi chí ndo, cuví cunyeé ñni yo chí ra, vatyí maa ra cusacuvi ra tandihí maa ihya.

Nu ndihí cahan ra Pablo ta chaha ra nocumi chí ñu

25 Yañi, çacan tahvi ndo cha cuenda ndi.

26 Ta naçuhva ndo nocumi chí tandihí yañi yo cuenda Nyoo.

27 Tyatyíñé chí ndo chihin ndusu yuhu Sutu Mañi yo vatyí sacuahá ndo carta ihya nuu tandihí tahan yo cuenda Nyoo.

28 Ta na nasoco Sutu Mañi yo Jesucristo chí ndo. Ta na cuví chí tyicuan caa.

Tuhun cha sañahá ra Jesucristo chi yo
New Testament in Mixtec, Jamiltepec
(MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

7411d349-0f34-5963-987e-74457a7bad38